

1863 - La vischnaunca da Tujetsch pervia dils cunfins dall'Alp Tschamut ed il possess dil Mun Traviers

Ils 14 da settember 1863 entscheiva il process Tschamut encunter Tujetsch. Ils 21 da november 1863 croda la sentenzia:

Ord motiv che la ludeivla vischnaunca da Tujetsch, sco part plonschenta, ha buca presentau sufficients mussaments per la proprietad dil questiuneivel territori e consequentamein tenor principis processuals, sto vegnir decidiu en favur dalla risposta (Tschamut). La ludeivla vischnaunca da Tujetsch ei cun sia pretensiun da proprietad vid il Mun Traviers entruidada tiella pazienzia.

Muster, ils 14 da settember 1863

Las diesch avonmiezdi ei seradunaus en casa cumin il tribunal districtual dil **Rein Anteriur** en ina fatschenta denter ils vischins da **Tschamut** e la ludeivla vischnaunca da **Tujetsch** pervia da confins dall'alp da **Tschamut** ed il possess dil **Montreviers Mun Traviers**.

Il dicasteri (*dertgira*) era cumponius sco suonda:
president dr. Berther, mistral Arpagaus,
assistant Caduff,
litinent Bruno Lombris,
statalter Anton Decurtins,
Thomas Condrau,
gerau Franz Decurtins,
actuar Tuor
e salter Tgetgel

Il signur president communichescha al tribunal il status dalla fatschenta; sinquei passan las parts avon ed il tribunal vegn da quellas legitimaus senz'opposiziun.

Il president legia giu igl entruidament dil plogn ad acta e las parts produceschan ad acta lur plenipotenzas.


Signur advocat Christ deplorescha en num dils vischins da **Tschamut** sco plogn; ch'igl entruidament cuntegni buc era la prezisa pretensiun dils da **Tujetsch** visavi a ses clients da **Tschamut**.

Sereferend sin restonzas da tegias, stavels e trutgs el circuit da **Mun Traviers**, che hagi da vegl enneu fatg cumpart cull'alp da **Tschamut** e sefundont sin §37 digl uorden principal, garegia el che la counterpart dueigi surprender la rolla da plogn.

Signur advocat Oswald, en num dalla risposta, respectiv la vischnaunca da **Tujetsch**, fa prender a protocol la declaranza dalla counterpart: Ch'in ual traverseschi e sparti l'alp da **Tschamut** la questiuneivla pastira da **Mun Traviers**.

Per demussar ch'ils da **Tschamut** seigien en possess dil questiuneivel revier alleghescha advocat Christ, ch'els hagien anno 1830 schau vi per tscheins, schau guder quella pastira senza difficultads e citescha per perdetgas da quellas varts:

Heinrich Lorez,
Franz Antoni Loretz, omisdus da **Wassen/Uri**.
Medemamein anno 1844 e 1845, dil qual stoppien dar perdetga,



assistent Cajacob da **Sumvitg** e
Gion Rest Caveng da **Surcuolm**.

In vischin da **Tschamut** hagi gudiu e segau la pastira senz'opposiziun, il qual attesteschi sco perdetga Bartholome Geromini da **Selva**.

Era hagien ils vischins da **Tschamut** da temps en temps priu si tiers sil **Mun Traviers** e seigien vegni pagai persuenter e retschiert il pagament en cassa da **Tschamut**.

En vertit da §210 dalla lescha processuala dueien persunals da **Tujetsch**, principalmein

president Beer,
Vigeli Valier,
Placi Schmed,
gerau Giacomet e
gerau Muggli vegnir
obligai da metter giu in engirament da quellas varts.

Dapli producesch'el per demussar il possess da **Mun Traviers** da vart dils da **Tschamut** tschun documents:

ina brev da 1398 renovada 1543,

ina brev da 1578,

ina brev da 1786,

ina brev da 1806

ed ina brev da 1845,

ils quals acts el producescha per buca sepregiudicar, dapli in secret da habilitad dallas perdetgas da Heinrich e Franz Anton Loretz dalla suprastanza da lur liug.

El vindichescha finalmein dalla ludeivla vischnaunca da **Tujetsch** las brevs da marcau dall'alp da **Cavradi**, **Maighels** e **Surpalits**, sco era in document digl avat da **Mustér**, che constateschi ch'il vischinadi da **Tschamut** hagi cumprau ora igl arvè.

Ulteriuramein alleghesch'el aunc sco perdetga Gion Pl. Schmed da **Camischolas** e garegia ina vesta occulara sil plaz questiuneivel e tschen't'en dretg, che la part adversaria vegni constringida da surprender la rolla da plogn, cun pagar tuttas spesas caschunadas entochen ussa, essend che quella hagi cun sias pretensiuns midau il status quo digl effect questiuneivel.

El garegia pil plogn, che la risposta vegni messa immediat, la risposta aber petiziunescha da puder haver endamen cun sia vart sur cert puncts, il qual vegn ad ella concediu e la sesiun aschia interruttta, fixada sin suentermiezd allas duas.

Suentermiezd

allas duas, en sia risposta garegia signur Oswald per la vischnaunca da **Tujetsch**, ch'ei vegni concediu a sia part da schar prender notizia dils acts produci dalla counterpart e quei en in termin commensurau.

Suenter replica e duplica, nua ch'il plogn ei insistius sissu, da buca schar prender enconuschientscha da quels acts, la risposta ha aber quei garegiau en siu petitum ni da far retrer quels, ein las parts passadas giu ed il tribunal, havend ponderau las raschuns purtadas avon, ha

Concluiu

da schar prender enconuschientscha las parts viceversa dils acts el spazi d'ina mes'ura sut survigilonza ufficiala ed a cundiziun, che la risposta deponi ils treis documents pretendi dalla counterpart.

Quels vegnan sinquei produci,

ina brev da 1660,

ina brev da 1625,

ina brev da cumpra da **Surpalits** e **Maighels** ed

ina brev da 1786.

Signur Christ pretenda suenter la mes'ura ch'ei existi en mauns dalla cunterpart aunc auters documents e garegia sut sarament da quella d'extradar els.

Signur Oswald reflectescha en sia risposta las reproschas fatgas al derschader da pasch. Havend quel giu fatg tuttas pusseivlas e favoreivlas proposiziuns als da **Tschamut**, hagi el mo anflau lur finala pretensiun per malraschuneivla, il qual passus signur Christ fa metter a protocol.

Oswald producescha lura igl emprem entruidament da dretg, che muossi tgei pretensiun il vischinadi da **Tschamut** fagevi l'entschatta.

El fa attents, ch'il **Mun Traviers** seigi dils da **Tschamut**, buca sco proprietad, sonderne mo communabel culs da **Tujetsch** sco cumpart vegnius gudius; ei seigi negins auters mussaments dalla cunterpart avon maun.

Ch'il **Mun Traviers** audi alla vischnaunca sco tala, seigi evident. Ord il num different dall'alp da **Tschamut** ord il tetel d'acquisiziun, il qual la cunterpart possedi buc e serecloma sil document da 1398, il qual dat en ils cunfins dall'alp da **Tschamut**.

Ord il document da 1625, nua ch'ins sappi relevat ils cunfins da **Surpalits e Cavradi**, ord la convenziun denter ils vischins da **Tschamut** pervia il gudiment dallas pastiras, ord la brev da hipoteca da 1861 tiella Cassa da spargn, nua ch'ils cunfins dall'alp seigien era renconuschi.

Ord la circumstanzia, che **Tujetsch** hagi era adina gudiu sco cumpart ed alleghescha sco perdetgas:

Christian Joseph Walker,

Barbara Walker, nata Sievi, tuts da **Wassen** en **Uri** e domiciliai a **Tujetsch**; e

Clemens Riedi da **Madernal**.

Ord la vendita dils 29 d'avrel 1860, nua che **Tschamut** ha dalla vischnaunca perfin ingantau ina penda, numnada **Bollettas**, integronta dil **Mun Traviers** per 300 frs.

Lessi la cunterpart snegar quei, sch'indosseschi el als vischins da **Tschamut** igl engirament e producescha ad acta il protocol da vischnaunca.

Fussi il **Mun Traviers** staus tier l'alp, sche vessi **Tschamut** giu neginas pastiras, il qual possess signur Christ lai prender a protocol.

Sefundont pia medemamein sin §37 dalla lescha processuala, pretenda signur Oswald, che la part adversaria duei vegnir obligada da salvar sia rolla da plogn e da prender giu tuttas spesas a dato caschunadas.

Suenter replica e duplica, nua che signur Oswald ha aunc vuliu excepir encunter Placi Schmed sco perdetga e resolver a quellas damondas da legitimaziun, nua che signur Christ, aber sereferent sin §183 dalla lescha processuala, ha opponiu encunter, ein las parts passadas giu ed il tribunal ha ponderau las raschuns messas avon.

Concludiu

che las perdetgas seigien admessas senza resalva da puder far damondas da legitimaziun vid quellas. En medem temps ha il tribunal fixau sil di proxim, ils 15 da settember, la vesta oculara sil liug questiuneivel. Encunter sura conclus declara signur Oswald il recuors a protocol.

Ils 15 da settember 1863

Allas 7 avomiezdi ei il tribunal cullas parts serendius a **Tschamut** e priu en la vesta oculara. Signur Christ fa leu attents il tribunal, che las aschi numnadas **Bollettas** seigien situadas sut **Tschamut**, giu sper l'aua ed audien buca tiel **Mun Traviers**, il qual s'extendi mo tochen la siala dil cuolm sco ils vadretgs taglien en damaun dretg encunter l'alp da **Tschamut** e seniester encunter **Cavradi** e praus da particulars.

El fa attents

1. sill'aua, che vegni giu da **Maighels** e sparti il **Mun Traviers** cull'alp;
2. sil plaun aschi numnaus **Mühlematt**, *Prau Mulins era Plaun Mulins*
3. sin stavels e restonzas da tegias el circuit da **Mun Traviers**
4. sin in mir che formeschi ils cunfins dall'alp **Surpalits** e tagli encunter **Mun Traviers** l'aua che sparta **Surpalits**, l'alp e **Mun Traviers**.

5. sillas stuschonzas dall'Alp **Tschamut** encunter **Maighels e Surpalits**.

Signur Oswald fa prender a protocol la declaronza da signur Christ, ch'il **Mun Traviers** s'estendi dil spitg giu mo tochen tier la siala e sco ils trutgs dettien en e pretenda il cuntrari, che tut il plaun vegni numnaus **Mühlematt** e **Mun Traviers** senumni tut igl auter circuit da tschei maun dall'aua che vegni giu da **Maighels** ni l'entira spunda.

Medemamein fa signur Christ prender ad notum l'expectoraziun da sia cunterpart, che **Surpalits** e l'alp da **Tschamut** vegnien separadas tras l'aua che flessegi giu dil fil dil cuolm da **Muschaneras** encunter sera, sco aunc da sez mai haver declarau, ch'il toc sut **Mun Traviers** seigi alp ni pastira ni tgei ei seigi.

Sil retuorn a **Rueras** ha il dicasteri dau caschun allas parts da s'exprimer, sch'ellas veglien schar cuntinuar la fatschenta a **Rueras** ni a **Mustér** e sin giavisch serendius a **Mustér** aunc quella sera e fixau la cuntuaziun sil 16 allas nov.

Ils 16 da settember 1863

allas nov avomiezdi ei il tribunal puspei seradunaus ed il protocol dils 14 e 15 da quest vegnius legius avon ed approbaus.

Sinquei passan las parts avon ed il president vul schar leger avon ad ellas il protocol, il qual quellas refieran entochen alla fin dil process.

Signur Christ excepescha en in interlocut (*denterdiscuors*) encunter las perdetgas ocularas Chr. Josef Walker e sia dunna Barbara, essend ch'ei resulteschi posteriuramein che quels seigien vischins da **Tujetsch** e perquei sco talas buca admissiblas ed en vertit da §18 dalla lescha processuala stoppien vegnir excludi, essend en possess d'in scret d'origin dalla ludeivla vischnaunca da **Tujetsch**, il qual eri ad el buca enconuschent.

Signur Oswald rispunda, che quels dus personals seigien stai alla cunterpart bein enconuschents, el hagi buca giu fatg in'allegaziun faulsa, sonder mo detg, ch'els seigien da **Wassen** e sesents a **Tujetsch**; la cunterpart hagi quels admess sco perdetgas ed els seigien dil tribunal sco talas vegnidias legitimadas.

El tschent'en dretg, che las perdetgas restien admessas e la pretensiun dalla cunterpart per prescreta e tuttas spesas vegnien indossadas alla cunterpart.

En secunda lingia aber, ch'il tribunal admitti ils cuntermussaments, che Walker seigi ora d'**Uri**, sco resulteschi

1. ord las scartiras ed attests d'origin egl archiv da **Tujetsch**
2. ord informaziun tiella suprastanza da **Wassen** ni in'autra vischnaunca.
3. ord informaziun tiella canzlia guvernativa dad **Uri**
4. ord ils cudischs da quens dalla ludeivla vischnaunca da **Tujetsch**, che muossien ora, che tals personals paghien hinderset (*in vischin senza dretg da burgheis*), sur dil qual factum el vul indossal e statalter Riedi da **Tschamut** igl engirament eventualmein. §18 e 15 dalla lescha sclaudien buca quellas perdetgas, essend ch'ei seigi neginas midadas praticas.

Signur Christ garegia ordavon, ch'il scret d'origin en questiun, vegni requirius, dil qual signur Oswald ei era cuntents.

Il signur president surdat en quei mument il pretendiu document, scret d'origin, obtenius digl emprem gerau da **Trun**. Suenter plogn e risposta, replica e duplica en in interlocut (*denterdiscuors*), el qual advocat Christ protesta encunter tuts mussaments dalla cunterpart sco nunadmissibels encunter in document ufficial tenor §158 e 159, sco era encunter entgin engirament statalter Riedi en vertit da §204 e 206 nunhavend saviu mussar ora, ch'il document d'origin seigi nunvaleivels ni illegals; el qual signur Oswald aber sco risposta ei insistius sill'admissibilitad da cuntermussaments, essend ch'el hagi giu fatg negina faulsa allegaziun e declara a protocol siu emprem petitium:

1. che la pretensiun da refusar las perdetgas seigi prescreta.
2. che cuntermussaments vegnien schai tier tenor §153 e las spesas indossadas alla cunterpart, ein las parts passadas giu ed il tribunal ha refretg e fixau la sesiun sillas duas suentermiezd.

Gerau Duri Wenzin declara privat a protocol, che la suttascripziun, el scret d'origin producius, seigi buca la sia per persunalmein buca sepregiudicar.

Suentermiezdi

allas duas ei il dicasteri vegnius ensemens ed ha ponderau e reflectau, ils petitums e las raschuns dallas parts pertadas avon e

Decidiu

ch'il plogn, respectiv **Tschamut**, seigi autorisaus tier l'excepziun supervegnenta, relativa all'admissibilitad dallas perdetgas Christian Josef Walker e sia dunna Barbara ed en consequenza da quei secundo duei encunter igl act d'origin (Heimatschein dils 29 d'avrel 1862) sco document public formalmein legals, vegnir schau tier negins cuntermussaments e las perdetgas Walker e dunna seigien consequentamein nunadmissiblas.

Encunter sura conclus declara signur Oswald il recuors tiella dertgira cantunala.

Sinquei vegn ei cun cuntentientscha dallas parts fixau in termin peremptoric entochen ils 21 proxim per dessignar las respectivas damondas vid las perdetgas e schar scumiar ora quellas per puspei remetter agl uffeci entochen ils 26 proxim.

Plinavon garegia signur Oswald che tuttas perdetgas vegnien pridas en sil plaz questiuneivel, il qual vegn era dau tier dalla cunterpart, sch'il tribunal anfli per bien e quellas serendien.

Il tribunal destinescha sin quei da citar e prender en tuttas perdetgas sigl emprem d'october proxim sil plaz questiuneivel tras ina cumissiun consistenta ord

sgr. president dr. Berther,

mistral Arpagaus,

Thomas Condrau

ed actuar Tuor.

Las perdetgas, che cumparan buc, dueigein eventualmein vegnir pridas per compass.

Sinquei ha il dicasteri serrau sia sesiun.

Mustér, 1. october 1863

Ei en fatschenta denter il vischinadi da **Tschamut** e la ludeivla vischnaunca da **Tujetsch** la cumissiun destinada per prender en las respectivas perdetgas sil plaz questiuneivel da **Mun Traviers**, consistend ord

sgr. dr. Berther,

mistral Arpagaus,

Thomas Condrau

ed actuar Tuor,

seradunada allas 7 avonmiezdi a **Mustér** e serendida da leu sur **Tschamut** denter **Mun Traviers**, l'Alp **Tschamut** e **Surpalits**.

Leu ein las perdetgas cumparidas, gl'emprem vegnidas saramentadas e silsuenter interrogadas sur las damondas fatgas vid elllas dallas parts sco suonda:

1. Heinric Lorez

2. Franz Anton Lorez, omisdus d'**Uri**

3. assistent G. B. Cajacob, **Sumvitg**

4. Barclamiu Geromini, **Selva**

5. Clemens Riedi, **Madernal**.

Las deposiziuns messas per scret e confirmadas, ein cumissiun e perdetgas turnadas a casa.

Trun, ils 17 d'october 1863

Han il president ed actuar, cun trer tier il derschader statalter Andriu Decurtins, priu en sco perdetga

6. Placi Schmed da **Camischolas**,

essend quel promuraus dad ir a fiera e zuar en fatschenta denter **Tschamut** e la ludeivla vischnaunca da **Tujetsch** pervia dil **Mun Traviers**.

Stadas messas per nota e confirmadas sias deposiziuns ei sura perdetga veginida relaschada.

Trun, ils 19 d'october 1863

Ein en fatschenta denter il vischinadi da **Tschamut** e la ludeivla vischnaunca da **Tujetsch**, allas 10 avonmiezdi, cumparidas las parts avon il tribunal sco avon notificaus per cuntuaziun dil suspendiu process. Gl'emprem ei gerau Gion Rest Caveng da **Surcuolm** sco perdetga veginius saramentaus ed interrogaus. Silsuenter veginan las parts clamadas avon e las deposiziuns dallas perdetgas legidas giu. Quei daventau, remarca signur Oswald, ch'el hagi giu garegiau da requirir la brev da hipoteca tier la Cassa da spagn, ch'existi sill'alp da **Tschamut**. Signur Christ protesta encunter, essend che quella seigi mo veginida allegada senza camond da requirir ella. Sin quei vegin la sesiun serrada e fixada sin las duas suentermiezdzi.

Suentermiezdzi

allas duas repren il tribunal la sesiun ed il president relata che omisduas parts desistien da far prender giu ils engiraments pli baul indossai, relativs a certa personals e declara, ch'ei seigi buca veginiu gariau da requirir ex officio la pretendida brev da hipoteca.

Signur Oswald garegia requisizun da quella avondecisiun sulla posiziun dallas parts, il qual sgr. Christ dat tier, che la brev che **Tschamut** hagi cumprau ora igl arvè, vegini medemamein requirida dalla venerabla claustra da **Mustér**.

El passi tier la replica sut condizion che sur quels documents vegini silsuenter schau tier negina discussiun.

Passond tier la replica pretenda el, ch'il tribunal sappi en sia decisiu sulla posiziun dallas parts risguardar mo il gudiment exercitaus d'ina part e l'autra, il qual demonstreschi en medem temps era in possess.

Che sia part hagi gudiu sco atgna proprietad il questiuneivel **Mun Traviers** seigi evident.

Ord la concessiun dalla risposta sezza che **Tschamut** hagi gudiu talmein il **Mun Traviers** dil cargar entochen scargar dad alp, numnadamein dils 24 da zercladur naven.

1. Ord las deposiziuns dallas perdetgas Loretz ed assistent Cajacob, ch'els hagien cargau avon s. Gions (24-06) e gudiu tut il questiuneivel terren.

2. Tras Placi Schmed seigi igl argument stabilius, ch'ils da **Tschamut** hagien plirs onns cuntuadamein priu si tiers avon s. Gion e tratg en persuenter igl arvè.

3. Sche certa vischins da **Tujetsch** hagien schau vi tiers si **Tschamut** ni gudiu da temps en temps, sche seigi quei mo in act da servitut.

4. Communicheschien certa trutgs reciprocamein dil **Mun Traviers** cull'alp da **Tschamut**, il qual seigi buc il cass cull'alp **Surpalits**.

5. Che **Tschamut** hagi gudiu e fatg diever da tut il revier questiuneivel confessien unanimamein tuttas perdetgas.

Vessi quei vischinadi pudiu guder il **Mun Traviers** mo sco cumpart, sche fussi ei mai veginiu concediu da schar vi quel ni prender si tiers senza lubientscha, mo sulla caussa ch'ins possedi, sappi ins disponer sin tala moda.

6. Vindicheschi la counterpart **Tschamut** risguard il gudiment dallas alps ina autra differenta posiziun als auters vischinadis, per consequenza sappi **Tschamut** era far ina excepziun el possess dil **Mun Traviers**. **Tujetsch** hagi la regla, che negin possi prender si tiers buc envernai en vischnaunca ed ins vessi segiramein era buca concediu quei als da **Tschamut**.

7. Per la decisiu sur la posiziun dallas parts seigi il mussament digl exercitau actual possess sufficients senza acts d'acquisiziun. Il **Mun Traviers** seigi part integronta dall'alp da **Tschamut**

e porti sco parcella, sco en otras alps il cass, in agen num.

8. Che **Tschamut** hagi hipotecau l'alp mo tochen tier l'aua da **Maighels** seigi indifferent, sche la Cassa da spargn seigi secuntentada cun la valeta digl effect hipotecau. Neginas perdetgas hagien attestau, che **Tujetsch** vessi gudiu ni possedi il Mun Traviers avon ils 24 da zerladur, mo duas hagien udiu, che **Tujetsch** hagi quei dretg; §181 dalla lescha processuala refuseschi talas perdetgas.

9. Cura che dus gaudien, seigi il possess da quel che exerciteschi quei dretg cuntuadamein. Il stavel **Bollettas** sesanfli buca el **Mun Traviers**, sonder lunsch naven, co quel seigi veginus vendius, declari la perdetga da Placi Schmed. Quella pretendida vendita hagi era giu liug 1860 d'in temps ch'il **Mun Traviers** eri schon questiuneivels. La counterpart ha pretendiu che **Tschamut** vessi neginas otras pastiras, vessi aber quella dumandau silla vesta oculara suenter talas, sche vessien els saviu mussar.

Tschamut hagi pia gudiu e possedi il **Mun Traviers** entochen ussa e **Tujetsch** vegli midar quei status quo e duei per consequenza, tenor petitum e §87 digl uorden processual, era veginir obligada da surprender la rolla da plonschider cun prender tuttas spesas giudizialas entochen da cheu e pagar a sia part per extragiudizialas tenor nota 640 frs. sur la qualas spesas duei en medem temps veginir decidiu.

Signur Oswald per la risposta, duplicescha, che buc el, sonder la part adversaria, hagi produciu documents senza vuler schar far diever da quels.

Tenor §217 dalla lescha civila, stoppi in possess usurpau (*senza dretg en possess*) veginir restituius e sappi **Tschamut** buca veginir cun in gest tetel d'acquisiziun, sche seigi quel usurpaus.

Ord igl entruidament da dretg dils 7 da mars 1863 resulteschi, che **Tschamut** pretendevi gl'entir circuit da maun dretg dall'aua da **Maighels**. Egl entruidament dils 30 d'avrel 1863 aber, che survecheschi per basis el vertent process, seigi buc indicau ils cunfins dil **Mun Traviers**, quel mo qualificaus sco part integronta dall'**Alp Tschamut** da maniera che la counterpart sappi sezza buc tgei ch'ella vegli.

Ch'il **Mun Traviers** seigi part integronta dall'alp cumprada dalla venerabla claustra da **Mustér**, hagi la counterpart vuliu demussar cun producir sezza la brev da 1398 nua che l'aua da **Maighels** seigi definida exact per cunfins dall'alp encunter il **Mun Traviers**.

Sch'ei resulteschi pia che quel seigi pastira e buca part integronta dall'alp, sche stoppi la counterpart menar il plogn sefundont sin §151 dalla lescha processuala.

Ord il document da 1786 seigi la decisiun relavada, che **Tschamut**, havend in'atgna alp, hagi negina part dallas alps da vischnaunca.

Tenor statuts da vischnaunca possedi **Tschamut** negina atgna pastira, hagi bein aber giu il dretg da guder il **Mun Traviers** soliamein da s. Gion naven, mo quei statut sappi era veginir midaus. Entochen ussa hagi la counterpart fatg valer che quei toc sut la **Siala** audi era als da **Tschamut**, seigi alp ni pastira, mo silla vesta oculara, buca astgau declarar, che l'alp s'estendevi sur l'aua da **Maighels** vi; ussa aber fetschi ella ord pastira alp e vegli midar la pastira dil questiuneivel object.

Plinavon prescrivien las perdetgas ni frars Lorez e Placi Schmed pli bia als da **Tschamut** che quei ch'els sez pretendien actualmein; assisstant Cajacob e B. Geromini aber, era perdetgas adversarias, numnien l'alp dadens l'aua da **Maighels** e dadora pastira.

Cun duas perdetgas, Clemens Riedi e B. Geromini, seigi demussau, che la vischnaunca u **Tujetsch** hagi saviu guder la pastira avon s. Gion e cun duas outras, Cajacob e Caveng, che l'alp seigi buca veginida cargada avon s. Gion.

1861 hagi Tschamut hipotecau si'alp el total per la totala summa cun dar en per cunfins l'aua da **Maighels**.

Placi Schmed e Geromini confessien, che **Tujetsch** hagi, sco el protocol da vischnaunca relevant, mess las aschi numnadas **Bollettas** sigl ingant, mo che **Tschamut** hagi acquistau quellas per 300 frs., pertgei eri quei sura pastira, sche erien era las **Bollettas** pastira.

Pretendi pia **Tschamut** il **Mun Traviers** sco alp e buca sco pastira, sche stoppi quel menar il plogn e mussaments. Secartevien ils vischins da **Tschamut** d'esser en possess da tala pastira, sche duevien els spitgar entochen che **Tujetsch** levi scatschar ord quel avon che plonscher. Sefundond sin ses arguments menai; tschenta signur Oswald per la risposta en dretg, che **Tschamut** vegni obligaus da salvar la rola da plogn ed obligaus da prender giu tuttas spesas giudizialas e bonificar a sia part per extragiudizialas tenor nota 430 frs. Signur Christ declara ed insista sissu ch'el surdetti cun la nota dallas spesas era en secret il "tschentau en dretg", encunter il qual modus signur Oswald protesta, essend encunter lescha en caussa interlocutuala. Las parts passan giu ed il tribunal ha

Renconuschiu,
ch'il "tschentau en dretg" possi el vertent cass vegin remess en secret. Sinquei vegin la sesiun sligiada si e remessa sils 20 current allas 9 avonmiezdi.

Ils 20 d'october 1863

Essend vegniu tard entochen che las parts han giu requiriu ils dus documents aunc pretendi,
- brev da convenziun da 1861 cun la venerabla claustra da **Mustér**,
- brev da hipoteca sill'alp da **Tschamut** da 1861 ed era dau en ils
"tschentai en dretg",
ei il tribunal seradunaus per

suentermiezdi
a l'ina ed il president legia avon ils tschentai en dretg dallas parts e sinquei entra il dicasteri en deliberaziun e discussiun sur da quels.

Suenter

haver priu notizia dils "tschentai en dretg" dai en dallas parts e quels reflectau, sco era suenter haver ponderau ils mussaments litterals e personals produci; ha il tribunal en la damonda pendenta tgei part litigonta hagi da supreender la posiziun da plonschider.

Ord consideraziun, ch'il vischinadi da **Tschamut** ha neu e neu tras repetidas disposiziuns sur dil dispeteivel revier numnaus "**Mun Traviers**", sco nominitivamein entras accordar vi da segar certas parcellas da quel; entras schar guder quel per tscheins e cargar el cun tiers interns ni externs e zuar era avon s. Gion, ils 24 da zercladur; aschia exercitau lundervi concludents acts da possess.

Ord consideraziun, ch'ei setracta mo d'in interlocut (*denterdiscuors*) e ch'ina eventuala repartiziun dallas spesas, essend quellas era per part occasionadas cun risguard sil meritum caussa sez, sa vegin suspendida tochen la finala sentenzia, interlocutarialmein

Renconuschiu

La ludeivla vischnaunca da **Tujetsch** ei obligada da supreender la posiziun da plonschider e la decisiun sur las spesas ei refretga tochen tier la finala decisiun. Las spesas giudizialas entochen da cheu el total importo da 559.10 frs. ein veginidas pagadas ord las segiradas.

Sinquei veginan las parts clamadas avon per comunicar ad ellas la sentenzia, aber mo la part da **Tschamut** cumpara.

Signur Christ damonda, sche la counterpart hagi remarcas da far sin la sentenzia dad'ora ni dau entgina cumissiun al signur president.

Quel declara, che Oswald hagi garegiau che la sentenzia vegni ad el tarmessa tier. Sinquei fa advocat Christ prender protocol che la counterpart piardi tuts dretgs da far valer suenter entginas raschuns (Rechtsmittel).

La counterpart seigi absenta e s'absentada senza lubientscha e tenor §141 dalla lescha processualia stoppi il tribunal far vinavon il process, essend la sentenzia passada en vigur ed il recuors hagi buca pli liug.

Il stregn senn e dretg da §136 e 137 digl uorden processual aber lubeschi ad el da garegiar, ch'il tribunal dueigi enviar anavos **Tujetsch** cun siu entruidament da dretg e tuttas pretensiuns vid il **Mun Traviers** cun far prender giu tuttas spesas.

En secunda lingia denton fetschi el il petitum, ch'il tribunal giudicheschi en contumazia (*en absenza*) cun dar in termin da purgaziun (*purificaziun*) ed obligar la cunterpart da prender giu tuttas spesas tenor lescha.

La part da **Tschamut** ei sinquei passada giu ed il tribunal ha

Concludiu

da sligiar si la sesiun entochen ils 23 da quest ed egl interval comunicar la sentenzia alla part absenta e sin quei di clamar en las parts.

Trun, ils 23 d'october 1863

Ei il tribunal seradunaus ed il signur president relata che sin communicaziun dalla sentenzia hagi signur Oswald declarau il recuors tier la dertgira cantunala, cun brev dils 22 da quest. Sinquei vegn il protocol dils 15 da settember, 1., 19 e 20 d'october legius avon ed approbaus. Las parts vegnan clamadas en ed il president communichescha a quellas sura declaranza da recuors.

Gerau Wenzin, en num da **Tujetsch**, damonda da refierer la sesiun entochen suentermiezdi, essend che lur advocat seigi aunc buca arrivaus e la sesiun vegn lura fixada sin l'ina suentermiezdi.

Suentermiezdi

a l'ina repren il tribunal la sesiun e las parts vegnan clamadas avon. Sin supplica dil president da metter il plogn, passa signur Oswald tier quel sut cundiziun, ch'il recuors declaraus tier la dertgira cantunala vegni prius per nota el protocol e senza pregiudezi da puder far valer quel a siu temps.

El fa attents il tribunal, che **Tschamut** hagi avon mediaziun plonschii pil **Mun Traviers**, aschia mo per quei toc silla vesta oculara indicaus, pretendend quel per atgna proprietad sco part dall'alp e buca sco pastira.

Ei seigi era enconuschent che **Tujetsch** hagi communabel il gudiment da tuttas pastiras e che quellas seigien proprietad da vischnaunca e buca da certs vischinadis.

El serecloma sils documents deponi e duas perdetgas en favur dalla communabilitad dallas pastiras.

Plinavon sigl emprem entruidament da dretg, nua che **Tschamut** sez detti tier che las pastiras tuttas audian alla vischnaunca e sereferescha per notoritad da quei document sin §151 dalla lescha processuala.

Per mussament che las pastiras vegnien gudidas da cuminanza en vischnaunca da **Tujetsch**, producescha el sco perdetgas

Anton Derungs, sesents a **Rueras**,

Fidel Gamboni, **Tujetsch**,

Josef Antoni Gamboni, **Tujetsch** e

Christ Fidel Capaul, **Tujetsch**

e che quei seigi era analog il cass en autras vischnauncas dil cumin, sereferesch'el sillars suandontas perdetgas,

mistral G.G. Condrau,

assistant G.G. Paly,

president Benedetg Lombris e

maior Carigiet.

Era seigi presumziun (*supposiziun*) giuridica, ch'il **Mun Traviers** seigi pastira, essend dividius dall'alp tras l'aua da **Maighels** ed en quei cass stoppi tenor §151 la cunterpart menar ils mussaments. La brev da cumpra da 1398, renovada 1548, che duei esser tetel d'acquisiziun, termineschi l'alp tras las duas auas, che siarien en l'alp e tras **Maighels**.

Signur Christ hagi al tribunal dau tier, che l'aua da **Maighels** seigi la medema exprimida el document da 1398. Ei seigi buca pusseivel da capir in'autra aua; sco la localitat muossi, fussi in'autra sulet aunc da tschei maun dil **Mun Traviers** encunter **Cavradi**.

Che **Tujetsch** hagi vendiu las **Bollettas** seigi argument avunda, che quellas udevein sco pastira alla vischnaunca.

El sereferescha plinavon sin las brevs da vendita da **Surpalix, Cavradi e Maighels** e sin la brev hipotecara existent sin l'**Alp Tschamut** e vul haver produciu igl original da quella formalmein, sche la counterpart duessi buca renconuscher mo la copia nunfidimada per valeivla.

Sereclamond finalmein sin las deposiziuns dallas perdetgas pridas en e plinavon citadas, tschent'el il petitum.

Il tribunal vegli renconuscher, ch'il toc sur la **Siala**, sco indicaus e determinaus dalla counterpart tras trutgs e numnaus **Mun Traviers**, seigi pastira e sco tala proprietad da vischnaunca cun obligar la part adversaria da prender giu tuttas spesas giudizialas ed extragiudizialas entochen da cheu. Lessi la counterpart sepatrunar dil **Mun Traviers** tras prescripziun, sche savessi quei daventar mo en bona fide, il qual sappi cheu aber buc esser il cass; il possess fussi usurpaus.

Signur Christ protesta en sia risposta gl'emprem encunter entgin recuors e resalva da quellas varts tuts dretgs sco pli baul allegau.

La counterpart hagi fundamentau per sesezza la proprietad dil **Mun Traviers** tras negins arguments; aschia decidi §155 dalla lescha processuala en sia favur.

Tujetsch hagi era buca mussau ora in tetel d'acquisiziun.

Particulars jasters possedien sin territori da **Tujetsch** gie era prau ed alps. Sco prescripziun existi la lescha da 1668 (Landesgesetz) che survechi en quei cass per norma e tenor la quala tuttas pretensiuns stopppien vegrifatgas pendentas enteifer 12 onns.

Perdetga Caveng hagi aber schon priu si e gudiu il **Mun Traviers** anno 1825, frars Lorez anno 1830 e zuar avon s. Gion.

Per consequenza duevi **Tujetsch** lura schon plonscher enstagl far per 1857 quei toc dispiteivels. Il document da 1398 seigi mo ina brev da tscheins ed ils cunfins leu exprimi en favur da sia part.

Ils documents dalla part adversaria da 1786 e 1680 plaidien negliu dil **Mun Traviers**, mo indicheschien las stuschonzas en favur da ses clients.

Il **Mun Traviers** audi a **Tschamut** sco il document da 1398 ed in nundisturbau possess da varga 30 onns demuossien, ei stetti pia era en libertad da **Tschamut** da guder quel sco alp ni pastira, tut ni mo in toc.

Essend ussa la counterpart plonschider sappi ella plonscher per tut la spunda da quest maun l'aua da **Maighels**, ni mo per in toc sco ella vegli.

Fagend **Tschamut** in'excepziun cullas alps en vischnaunca, sche seigi ei era presumziun giuridica, ch'el sappi far tala cun las pastiras en general ni pastiras dad alp.

La counterpart hagi ni cun acts, ni cun mussaments saviu deduir per sesezza in tetel d'acquisiziun; eventualmein audi pia il **Mun Traviers** a **Tschamut** en consequenza da presumziun e sereferescha da quellas varts sin §202 dil dretg privat e §151 dalla lescha processuala.

El producescha en caussa principala sco perdetgas,

Placi Schmed,

B. Geromini e

Gabriel Caveng da Surcuolm

e sco mussaments aunc ina brev ni convenziun denter **Selva e Tschamut**, la quala duei vegrifatgas requirida tier la vischnaunca da **Tujetsch**, sco era il rodel dallas alps e pastiras.

Lessi **Tujetsch** snegar il possess da quels ni da mai haver partiu en il **Mun Traviers** en lur pastiras pil gudiment da quellas, sch'indoseschi el a certs privats da quellas varts igl engirament, sco era en vertit da §204, igl engirament principal negond il cass, che buca **Tschamut** hagi pagau taglia pil **Mun Traviers** e garegia dalla counterpart la producziun dil cataster da vischnaunca.

Petitum

Il tribunal vegli renconuscher a sia part il **Mun Traviers** cun obligar la counterpart da prender giu tuttas spesas giudizialas ed extragiudizialas. Risguardond las perdetgas producialas da counterpart stoppi el haver endamen cun ses clients avon che s'exprimer.

Suenter cuort interval garegia signur Christ, renconuschend las quater davosas perdetgas dalla counterpart sco legitimadas, da puder far damondas da legitimaziun vid las autres ni eventualmein in commensurau termin d'informaziun.

Signur Oswald oppona leu encunter e protesta principalemin cun petitium encunter prender en B. Geromini e Placi Schmed

per ina secunda gada ella medema caussa, sco nunlubiu e da puder sez far eventualmein damondas da legitimaziun vid Placi Schmed.

Anton Gabriel Caveng renconuschi el sco perdetga legitimada, sche la counterpart accepti era las lur. Partenent ils documents requiri ed engiraments indossai, stoppi el resalvar.

Suenter replica e duplica, nua che advocat Christ petiziunescha per in termin d'informaziun sur las perdetgas entochen la damaun dils 24 da quest e secund che Placi Schmed e B. Geromini vognien admess per ina secunda gada.

Oswald aber sco avon refusa quei, ein las parts passadas giu ed il tribunal ha ponderau ils petitiums ed interlocutualmein

Renconuschiu

da conceder allas parts in termin d'informziun sur las producidas perdetgas entochen ils 24 da quest allas 8 avonmiezdi, sco era da far en caussa principala vid las perdetgas gia legitimadas damondas ulteriuras.

Encunter sura conclus declara signur Oswald il recuors tier la dertgira cantunala. La sesiun vogn sligiada si e fixada sil di proxim allas 8 avonmiezdi.

Ils 24 d'october 1863

Repren il tribunal la sesiun. Las parts clamadas avon, excepesch signur Christ encunter la perdetga da

Christ Fidel Capaul che duei esser falits, sereclamond sin mistral Weckher d'**Andiast**.

Renconuschent las autres perdetgas adversarias per legitimadas, garegia el che las damondas e counterdamondas vognien fatgas sil di dad oz e scumiadas ora.

Signur Oswald protesta encunter entgins conclus da part dil tribunal en absenza dil derschader mistral Arpagaus, che vogn dil president sinquei perstgisaus.

Christ Fidel Capaul seigi buca falits, ed essend el necesitaus da s'absentar, garegia el 8 dis termin per far las interrogaziuns vid las perdetgas.

Advocat Christ vul ch'il tribunal secumpletechi, sch'el seigi incumpetents el vertent cass, dil rest insista el sin siu petitium. Oswald denton desista da far cumpletar il tribunal. Passadas giu las parts, ha il tribunal ponderau ils tschentai petitiums e

Concludiu

da dar temps allas parts per far e scumiar ora las damondas vid las perdetgas entochen ils 2 da november proxim, cun fixar sco di da dretg ils 4 da november 1863.

Signur Christ protesta a protocol encunter tuttas spesas, che pudessien vognir caschunadas tras prolungaziun dil process e declara il recuors encunter il proceder da dar alla counterpart otg dis ed a sia part mo in di termin da far las counterdamondas.

Sinquei vogn la sesiun sligiada si.

Trun, ils 4 da november 1863

Allas 10 avonmiezdi seraduna il tribunal sco avon cumparius en medema fatschenta. Las parts passadas avon, relatesch'il president las deposiziuns da mistral Weckher prius en per compass e la legitimaziun da perdetga

Christ Fidel Capaul.

En consequenza da sura disposiziuns renunziescha advocat Gabriel per **Tschamut** sill'excepziun da sura perdetga muort concuors, vul aber far valer quella per raschun, ch'il termin fixaus per far las damondas, seigi ussa spiraus. Da perdetga B. Geronimi desisti el. Oswald oppona encunter la procedura dalla part adversaria, remarcond che Christ Fidel

Capaul eri aunc buca legitimaus sco perdetga, dil rest hagi era la cunterpart consignau sias damondas suenter spiraziun dil fixau termin peremtoric. El tschenta il petitum, ch'il tribunal vegli renconuscher Placi Schmed per sclaus sco perdetga e che sia part hagi il dretg da far sias damondas vid Christ Fidel Capaul, muort l'errur fatga dalla part adversaria sezza.

Dallas perdetgas Joseph Antoni Gamboni ed Anton Derungs desisti el. Suenter replica e duplica ein las parts passadas giu ed il dicasteri, havend ponderau ils petitums ha

Concluiu,

ch'el senn dil protocol seigi il termin buca staus fixaus peremtoricamein e las parts hagien aschia il dretg da metter reciprocamein lur damondas vid las perdetgas. Essend major Carigiet maldisposts, sche vegr ei concludiu da tedlar quel sco perdetga en casa sia e destinau leutier mistral Arpagaus ed actuar Tuor.

La sesiun vegr sinaquei remessa sillas duas suentermiezdi.

Suentermiezdi

allas duas ha il tribunal repriu la sesiun e las perdetgas ein vegrnidas saramentadas en preschientscha dallas parts e silsuenter interrogadas sco suonda:

nr. 9 Anton Gabriel Caveng per compass pli baul

nr. 10 Gerau G. G. Pally

nr. 11 Major Carigiet

nr. 12 mistral G. G. Condrau

nr. 13 Fidel Gamboni

nr. 14 president B. Lombris

nr. 15 Placi Schmed

nr. 16 Christ Fidel Capaul

Messas per secret las disposiziuns dallas perdetgas e cumparidas las parts, damonda advocat Gabriel cun petitum en num da **Tschamut** ina suspensiun dil process muort absenza e maldisposiziun dad advocat Christ tenor depescha e quei sereferend sin §91 dalla lescha processuala e sil proceder observaus entochen ussa dil tribunal.

Advocat Oswald protesta encunter entgina susposiziun per raschun che la part da **Tschamut** seigi assistida tras advocat Gabriel e sereferend medemamein sillas antecedenzias, sillia depescha dad advocat Christ sezza, che muossi, ch'ei seigi ina commoditat e buca malsogna e tschenta en quei senn siu petitum cun protesta encunter tuttas spesas.

Las parts passan giu suenter replica e duplica ed il tribunal ha ponderau ils petitums da quellas e

Concluiu

da conceder ina suspensiun cun reserva da decider sullas spesas alla finala, risguardond la part ch'ha dau caschun tier quellas e fixau sco proxim di da dretg ils 19 dil meins current. Las parts vegrnan clamadas avon ed ei vegr communicau ad ellas sura conclus. Advocat Oswald fa prender a protocol l'antecedenta expectoraziun d'advocat Gabriel, ch'el fussi necessitaus da clamar en dretg la venerabla claustra da **Mustér**, sch'il tribunal obligheschi el da funcziunar pils da **Tschamut**. Sinquei vegr la sesiun sligliada si.

Trun, ils 19 da november 1863

Ei il tribunal allas 10 avomiezdi radunaus en fatschenta denter **Tschamut** e **Tujetsch** e las parts clamadas avon, passa il president tier la communicaziun dallas deposiziuns dallas perdetgas. Signur advocat Christ garegia ch'avon duei la cunterpart reponer ils documents da quella requiri. Advocat Oswald declara, ch'ils registers da taglia seigien deponi; ina brev compromissala denter **Selva** e **Tschamut** e partizun dallas alps per secret ni rodel possedi **Tujetsch** negins.

Sinquei insista signur Christ sigl engirament deferiu pli baul da quellas varts tenor §166 als geraus da vischnaunca nominativamein sco aunc a gerau Hans Giachen Beer. Oswald sereclamond sin §178 dalla lescha garegia che gl'emprem dueien las deposiziuns dallas

perdetgas vegr legidas giu e resalva da far pli tard sias remarcas ed excepziuns encunter adossar engiraments.

Advocat Christ remarca, che l'ediziun dils requiri documents ni la decisiun suls engiraments mondi avon, ton pli che la counterpart sei seschada en discussiun sur da quels e tschenta siu petitum en quei senn sereferend sin §99, 163, 164 e 166. Tenidas la replica e duplika passan las parts giu ed il tribunal ei entraus en discussiun suls petitums ed ha

Decidiu,

che la part da **Tujetsch** duei gl'emprem far sias excepziuns riguard ils engiraments vindicai.

Las parts vegnan clamadas en e communicau ad ellas sura decisiun, declara signur Oswald, che la counterpart duei avon che vuler far metter giu engiraments stuer indicar e precisar ils vindicai documents cun liug e datum; d'ina brev compromissala denter **Selva e Tschamut** hagien ils geraus negina enconuschientscha ed era buca anflau entginas disposiziuns sur rodel e serefersescha sin §123 per demussar ch'el vertent cass seigien mo il geraus en uffeci obligai da metter giu igl engirament ed ei sei era sufficient da prender giu quel mo d'in persunal.

Advocat Christ pretenda, che **Tujetsch**, sch'ella sei en possess dils vindicai documents, il qual ella stoppi saver, sei era obligada d'extradar quels, seigien quels lura da tgei datum ch'els veglien ed insista da far prender giu igl engirament d'ediziun

a Hans Giachen Beer en vertit da §164 e

a gerau Duri Wenzin e

gerau Muggli

cun declaranza da dar en sez las verbalias da quel.

Oswald replichescha che sur l'ediziun dad acts incerts sappi buca vegr indossau in engirament e tschenta en dretg, che la counterpart vegni entruidada en quei grau tiella pazienza, en secunda lingia aber che mo in dils presents geraus duei stuer metter giu quel.

Advocat Christ desista sin quei dall'ediziun dalla brev cumpromissala denter **Selva e Tschamut**, insista dil rest sin siu petitum riguard il rodel.

Passadas giu las parts, ha il tribunal ponderau ils tschentai petitums e

Concludiu

d'indossal sulamein a gerau Hans Giachen Beer igl engirament riguard l'ediziun dil rodel da **Tujetsch**. La sesiun vegr remessa sillas treis suentermiezdri.

Ils 20 da november 1863


Essend las parts stadas en contractivas pervia dils engiraments indossal e per tard vegrnidas sur da quels d'entelgiantscha sco la part da **Tschamut** fa cheu metter a protocol plaid per plaid,

sch'ei il tribunal seradunaus per oz allas 8 avomiezdi e suenter che **Tschamut** ha giu surdau l'entelgiantscha per inscripziun el protocol, ei il tribunal passaus tier la communicaziun dallas deposiziuns dallas perdetgas.

Inscripziun da nr. 17 (mira seniester)

Die Gemeinde Tavetsch gibt zu, dass Jahr für Jahr die Anzahl Vieh, über die selbst gewirerte, mit welcher die Bürger diese oder jene Alp und Weide beziehen dürfen genau bestimmt wird, sowie dass beim Bürger das Recht hat überdies irgend welches Vieh aufzunehmen und vor oder während der Alpladung bei Hause zu behalten nur auf die Gemeindeallmende zu treiben nur diejenige Zahl Vieh, welche Jahr für Jahr von der Gemeinde für jede Haushaltung festgesetzt und gestattet wird.

Obigen Zugeständnis gegenüber Tschamut von allen Eidesde..... angetragen in der Antwort.



Legidas giu las deposiziuns dallas perdetgas passa signur Oswald tiella replica.

En quella remarca el, che **Tschamut** hagi avon mediaziun plonschiu mo pil **Mun Traviers** e sillla vesta oculara dessignau quel mo en pintga dimensiun sisum la spunda da quest maun l'aua da **Maighels** e zuar mo quei toc sul trutg dalla **Siala**, da maniera che mo quel sappi tenor principis giuridics esser igl object en questiun tenor §166 dalla lescha processuala; igl object en questiun stoppi restar il medem e sappi el cuors dil process buca vegrir midaus ni variaus e sereferescha en particular sin §55 e 56 dalla lescha processuala.

La cunterpart sei en sia risposta sereferida sin §155, mo il senn da quel sei auter che l'explicaziun dada e sappi vegrir aschi bein applicaus en favur dalla vischnaunca da **Tujetsch**. Plinavon drovi **Tujetsch** negin tetel d'acquisiziun per ina pastira, ei sei principi general egl entir cantun, che tuttas pastiras seigien in bein communal. **Tujetsch** consisti ord plirs vischinadis, che formeschien ina corporaziun ed hagien, priu ora las alps, tuts beins da cumionza, aschia era las pastiras e buc in vischinadi hagi in terren dividiu e separau.

Sefundont sin quella circumstanzia pratica e §214 dil dretg privat per presumziun (*supposiziun*) giuridica, stoppi in vischinadi che fetschi pretensiuns da quella natira visavi a vischnauncas sez menar ils mussaments tenor §151 dalla lescha processuala.

La part adversaria hagi sezza en siu Rechtssatz, sulla posiziun dallas parts, fatg diever da tala presumpziun. Sappi **Tschamut** buc mussar ora, ch'il **Mun Traviers** seigi alp, sche seigi ei era medemamein presumziun giuridica, che quei toc seigi pastira ed audi alla vischnaunca. Sut ils 7 da mars e 30 d'avrel sei il **Monttreviers Mun Traviers** pretendius sco alp els intruidaments da dretg e buca sco pastira.

En consequenza dallas allegadas duas presumziuns stoppi la cunterpart menar ils mussaments ed hagi era fatg emprovas da menar quels, havend sereclamau sin bien da cumpra da 1398, mo suenter vuliu pretender, che quella sei mo ina brev da tscheins; denton dependi ei buca, co ins hagi in effect, ch'ins cumpri.

Il document ditgi, che la claustra cedi a **Tschamut** l'alp encunter in tscheins annual e perpeten senza fixar co e cu pagar giu il capital.

Tschamut declari sez d'haver cumprau quella alp dalla claustra, ils quals passus signur Christ fa prender a protocol.

Las stuschonzas da quell'alp seien ella brev total en favur da **Tujetsch** e de halb hagi leu da significar ton sco die halb, sco halb sei en auters vegls documents ed ella brev da cumpra da **Surpalits** applicaus per dar en la direcziun ni las zonas.

Duessi die halbe aber vegrir priu el senn da „die Hälfe der Alp“, sche midi quei buc igl object, essend l'alp dividida tras in'autra aua permiez giu.

El pretenda che la brev da 1625 stetti en compleina harmonia cun quella da 1398 riguard las stuschonzas e muossi che **Tujetsch** vevi da lezzas uras schon pastira a **Tschamut** che sappi mo esser il **Mun Traviers**.

Sch'il document da 1680 cuntegni che **Cavradi** hagi untgidas encunter **Selva** e buc il **Mun Traviers**, sche sei quei fetg natural, ch'ei vegni dau quellas engiu e buc ensi e muossi ch'era la pastira sut **Cavradi**, nominativamein las **Bollettas** audien a **Tujetsch**.

El explicescha e recapitulescha in suenter l'auter ils documents da 1398, 1786, 1680, 1806 e la brev da hipoteca da 1861, ella quala **Tschamut** hagi renconuschiu che l'alp s'estendi buca sull'aua da **Maighels** vi.

Il cataster producius dalla part adversaria muossi che **Tschamut** hagi pagau taglia mo pell'alp e per negina pastira. Las **Bollettas** che seigien cun conclus da vischnaunca vegridas sin ingant e cumprads dils da **Tschamut**, sco perdetgas Geronimi, Capaul e Placi Schmed attestien, schaian da maun dretg dall'aua da **Maighels** giu dem il **Mun Traviers**. Perdetga Placi Schmed declari, che **Tschamut** paghi alla cassa pauperila annual 10 frs. per far fein a pastg sil **Mun Traviers**.

Sch'il vischinadi da **Tschamut** declari che sch'ins laschi ad els il **Mun Traviers** sco pastira da casa e renunzieschi sin tuttas outras pastiras da vischnaunca, sche secreigi el, ch'ins fussi culs da **Tschamut** gleiti perina, il qual passus signur Christ fa metter a protocol. Riguard la prescripziun remarca signur Oswald che **Tschamut** hagi entochen ussa el novissim temps renconuschiu l'alp mo enteifer ils cunfins sco la brev da 1398 plaidi e paghi aunc oz per far fein a pastg sil **Mun Traviers**. La lescha da 1668 sin prescripziun sei mo per pretensiuns persunalas

e buca realas.

En nossa ligia seigi il Bundesartikel entochen ussa staus en vigur e per pretensiuns realas sei leu negina prescripzion, sch'ins hagi buca gest tetel d'acquisiziun.

La lescha da 1845 e §202 e 369 dil dretg privat, dedui da quella el medem senn, stoppien survir per norma.

Riguard il possess exercitaus sil **Mun Traviers** repetta el, che **Tschamut**, sco part integronta dalla vischnaunca, hagi giu il dretg da guder il **Mun Traviers** sco cumproprietad e sche

Tujetsch hagi schau guder quella pastira **Tschamut** persulamein, sche sappi quei buca haver la consequenza d'entgina prescripzion. Las deposiziuns da Placi Schmed meretien tenor §183 buca gronda fida muort parentella ed attest da Fidel Capaul sin siu secuntener.

Las perdetgas da frars Lorez, assistent Cajacob, Caveng etc. attestien evidentamein ch'a **Tschamut** maunchi pil possess la bona fides e leutier possedien els (**Tschamut**) negin tetel d'acquisiziun.

Vessi **Tschamut** adina e quasi exclusivamein persuls gudiu il **Mun Traviers**, sche seigi ei en outras vischnauncas analog quei era il cass, mo negin sei vegniu sil patertgament da pretender mintgamai per sesez quei per proprietad, il qual schagi ad els il pli datier.

El tschenta siu petitum en tut sco il „tschentau en dretg“ muossa. Sia nota da spesas munta sin 400 frs.

Suentermiezdi allas duas ha il tribunal repriu la sesiun e la risposta menau la duplica. Signur Christ declara, ei seigi factum, che **Tschamut** hagi plonschiu avon mediaziun mo per la proprietad dil **Mun Traviers**, il qual hagi l'extensiun sco mussau sillla vesta oculara, il qual passus signur Oswald fa prender en protocol.

Egl entruidament da dretg sei il **Mun Traviers** fatgs disputeivels sco proprietad senza riguard da sia qualitatad sco alp ni pastira.

Ussa sei **Tujetsch** plonschider, mo hagi en siu plogn buca midau igl effect plonschiu ni en qualitatad ni extensiun ed ei seigi inutil da seschar en ussa pli lunsch. Havend la cunterpart saviu producir negin tetel d'acquisaziun, sche decidi §155 en favur da sia part. Mo sin via da presumpziun sappi ins buca acquistar il **Mun Traviers**, gl'emprem stoppi vegnir decidiu a tgi quel audi avon che decider, sch'el seigi alp ni pastira.

Fagend **Tschamut** riguard las alps ed uauls en **Tujetsch** in'excepziun dils auters vischinadis, sche seigi era da presumar che **Tschamut** sappi far tala riguard las pastiras.

Il passus che **Tschamut** hagi negina part vid las alps ed uauls da vischnaunca fa Oswald protocollar.

Christ protesta a protocol encunter il novum che **Tschamut** duei haver pagau 10 frs. per puder segar il **Mun Traviers** sereferescha da quellas varts sin §99 dalla lescha processuala.

Il catastre muossi evidentamein, che **Tschamut** hagi pagau taglia pil **Mun Traviers** inclusiv cull'alp e zuar suenter il diember da tiers che vegnan alpai.

Il document da 1398 cuntegni las stuschonzas en avantatg da sia part, schegie ch'ils cunfins d'in effect vegnien per ordinari indicai autruisa, il qual Oswald fa metter en protocol.

El refutescha (*refusescha*) in suenter l'auter las pretensiuns fatgas dil plogn ord ils documents da 1398, 1680, 1786 e 1806 e brev da hipoteca da 1861 e tuorna sigl exercitau possess da part da **Tschamut**.

Sia part hagi mussau ora tras perdetgas d'haver gudiu il **Mun Traviers** sulamein e nundisturbau varga 30 onns. La cunterpart hagi surduvravu certas perdetgas e las deposiziuns da Fidel Capaul e Fidel Gamboni merettien tenor §183 dalla lescha processuala negina fidonza. Per norma, co ina proprietad stoppi vegnir acquistada, surveeschien §186, 189, 197 e 202 dil dretg privat. La cunterplart aber hagi cun negins mussaments accompliu las cundiziuns exprimidas els allegai §§. La lescha da 1668 serefereschi sin pretensiuns personalas e realas ed ina lescha generala e cantunala stoppi preceder ad ina lescha mo locala.

Da 1835 entochen 1857 vessi **Tujetsch** giu il dretg da plonscher, suenter ils 12 onns aber sei tutta pretensiun prescreta.

Ch'il **Mun Traviers** sei buca vegnius partius ellas pastiras, muossi il protocol da vischnaunca, ord il qual resulteschi che negin possi duront la stad tener tiers buca sez envernai, il qual sei tiels da **Tschamut** buc il cass.

Sin petitum conform al Rechtssatz. Las ulteriuras spesas da sia part muntan sin 300 frs. tenor nova remessa. Sin quei vegn la sesiun sligiada si.

Ils 21 da november 1863

Allas 9 avonmiezdi ha il tribunal repriu la sesiun ed ei passaus en discussiun sur ils „tschentai en dretg“ surdai dallas parts en secret ed ha allura suentermiezdli relaschau la suandonta sentenzia:

Sentenzia

En caussa processuala denter la ludeivla vischnaunca da **Tujetsch** sco plogn d'ina vart encunter il vischinadi da **Tschamut** sco risposta da l'autra vart, ventilada avon la dertgira districtuala dil **Rein Anteriur**, concernent la proprietad digl aschignumna **Mun Traviers**

Ha quella,

suenter haver udiu plogn e risposta, viu en e tedlau ils mussaments litterals e persunals, priu en la vesta oculara, ponderau las citadas leschas cantunalas e specialmein ils finals „tschentai en dretg“ dallas parts.

Ord consideraziun che tenor gl'entruidament da dretg dils 30 d'avrel onn current, schibein sco el decuors dil process, s'estenda gl'object questiuneivel sur l'entira spunda che schai denter l'aua da **Maighels** e l'**Alp Cavradi**.

Ord motiv che la ludeivla vischnaunca da **Tujetsch** sco part plonschenta ha buca presentau sufficients mussaments per la proprietad dil questiuneivel territori e consequentamein tenor principis processuals (art. 155) sto vegnir decidiu en favur dalla risposta.

Ord consideraziun che la part **Tschamut** ha obteniu la pli part dils interlocuts (*denterdiscours*) ed era il meritum causae sez, denton aber tras ina suspensiun dau caschun tier spesas cun dretg e sentenzia.

Enconuschiu

1. La ludeivla vischnaunca da **Tujetsch** ei cun sia pretensiun da proprietad vid il **Mun Traviers** entruidada tiella pazienza.

2. Dallas spesas giudizialas egl importo dad 896 frs. paga la part dil plogn 4/5, la risposta 1/5. Per spesas extragiudizialas ha il plogn da bonificar 200 frs.

Communicada la sentenzia declara la part da **Tujetsch** encunter quella igl appellaz (*recuors*) tiella dertgira cantunala.

Sinquei fa la part da **Tschamut** l'instanza ch'ei vegni priu a protocol, ch'ei seigi cheu notoric (*enconuschent*), che la fiera dad **Ursera** crodi per ordinari denter ils 1 e 15 da zercladur.

Il plogn protesta encunter prender si tala declaranza.

Riguard la damonda dil plogn, da leger il protocol avon las parts, ei concludiu da setener vid igl art. 113 dalla lescha processuala, havend quei buca gariau avon entrar ella decisiu.

Suenter haver communicau quest conclus allas parts, ha il plogn encunter da quel declarau il recuors.

Ei vegn surschau als derschaders presents a **Trun** d'aunc passar atras il final protocol.

La sesiun vegn sinquei sligiada si

Per conform extract da protocol,
igl actuar A. Tuor



Dretg il **Mun Traviers**, dretg dil **Rein** ed dil **Plaun Mulins giu el funs**; oz **Prau Mulins**; ils Gualsers quei liug numnavan **Müllematt** (tenor Muoth Pulleuma / Bolliematta) che formava in uclaun habitau.